

Doenghnaz Seiqgeiq

□ Ya Yij Ya Yenz

Seizneix, youq gyang naz haeux
henjcwctwt neix, souhgozgi hung
lumj duzciengh youq diegnywj nei,
menhnumq noddough. Sing fwen
couh hwnj:

Souhgozgi gvej haeux,
Yaepyet couh gaiq naz;
Gvej fad vaiq dangqmaz,
Dwg fajfwngz raeuz guh.

Caiqlij yienghneix eu:
Ndae gwn imq daenj raeuj,
Cienz baengh raeuz fajfwngz;
Roengzrengz caezgya hwng,
Gouzfangzmbwng'yaeng'yaeng.

Seizdoeng, gwnz mbwn osoem-
soem, daengngoengz ronghsatsat,
dienheiq raeujrubrub, doenghnaz raiz-
banq. Ndw dieg bauguh riuzcienj,
gij saek gimhenj makvozganh daj
gij saek loegheu mbawvozganh ndawde
yet okdaeuj, caemh lumj gwnz mbwn
ndaundeiq nei. Va' byaek baenz co
baenz cumh, lumjbaenz yawj ndaej
raen duzrwi, duzmbaj youq gwnzde
foux hwnj foux roengz.

Ndaw doenghnaz vunz hix mbouj
ndaejhoengq. Cae doeng, ndaem

byaek,mbaet mak,gai gyoij,raemj oij,
nyaengq lumj moed caux rongz nei.
Cisamloek dienhdough rag mak sah-
dangzgi bae hawciengz nungzmau.
Giceh hix rag oij bae dangzcangj, rag
gyoij ok Gauhfungh.

Sing fwen hix cienz daeuj:
Hailangh geijcib bi,
Miz gwn caiq miz daenj;
Haeuj hag doegsaw gaenx,
Gaengq mbouj bae baiq saenz.

Gyoengqdou youq bak Duzsuh-
yenz yawj doenghnaz, dingq vunz
eufwen, caemh ndaej faen ndaej ok
cingcing cujcuj: Bouxlawz dwg boh-
lungz mehbaj, bouxlawz dwg boh' au
mehsimj, bouxlawz dwg daeggo beix-
sauj, bouxlawz dwg nuengxau nuengx-
simj, bouxlawz dwg daegmbauq
dahsau. Caemh faen ndaej ok byawz
youq gyauej Byahau cuk suijgu;
byawz youq Ndoibyarungh ndaem mak
ndaem oij; byawz youq baih Cikgeiz
dawz goengloh coih gvangq coih bingz;
byawz youq laj din Byayamz hwnq
laeuzmoq haubieg haubieg; byawz
youq laj din Byayiang daengi diuz
congheuq sanggyanggyang.

Gyoengqdou youq bak Duz-
suhyenz caenhcingz yiengjsouh gij
gingjsaek doenghnaz gyaundeix neix!

Gyoengqdou youq laj bya cae naz
rauq naz gvej haeux fad haeux, coih
roen, hwnq ranz, hawj doenghnaz
bienq mwn bienq heu bienq henj.
Gyoengqdou couh mbouj dwg boux
dawz doenghnaz veh baenz fuk dozveh
gyaundeix neix? Gyoengqvunz youq
gwnz bya ngonzyawj gij gingjsaek
doenghnaz gyaundeix neix, couh
mbouj dwg dawz gyoengqdou dangguh
mbangj gingjsaek gyaundeix ndaw fuk
veh neix lwi?

Gyoengqdou dwg canghveh, dawz
doenghnaz veh ok baenz fuk baenz
fuk dozveh doenghnaz! Gyoengqdou
dwg yenjyenz, youq doenghnaz yienj
ok baenz aen baenz aen "yingiben
doenghnaz Dahbyayiang"! Gyoengq-
dou dwg maz cungj baenz, ceiq
youqgaenj dwg gyoengqdou dwg boux
vunzguhnaz cingqcingq caencaen!

Gyoengqdou youq ndaw naz
guhong vihmar? Vanzlij mbouj dwg
vih bonjfaenh gwn,daenj,youq,byaij?
Vanzlij mbouj dwg vihliux saedceij
gvaq ndaej an'onj vuenyungz?

Doenghbaez gyoengqdou buek-
mingh guhhong, lij gwn mbouj imq,
daenj mbouj raeuj, byawz miz sim bae
yawj gij gingjsaek neix? Cungguek
moq laebbaenz caetib geij bi,
saedceij yied gvaq yied ndei, cij miz
simcingz bae yawj doenghnaz bi beij
bi bienq gyaue bienq ndei. Geij bi
neix daeuj, gyoengqdou ndaejhoengq
caemh okrog bae youzangq geij baez,
rogde gyaue hix gyaue raix, nauhyied
hix nauhyied raix, hoeng, baez ma
daengz mbanjranz dou yawj gij
gingjsaek doenghnaz neix, caenh rox-
nyinh engq doxndiep, engq maez-
vunz.

Mbouj rox vihmar? Aiq dwg
gyoengqdou youq doenghnaz lae hanh
lae lwed, cauh ok gij gingjsaek
doenghnaz gyaundeix ba!

Boux vunzguhnaz, doenggyaq
guhong cauh ok gij caizfouq vuzciz!

Boux vunzguhnaz, caemh doeng-
gyaq guhhong cauh ok gij caizfouq
cingsaenz!

Doengh 《Yingiben · Doenghnaz
Dahbyayiang》gag dauj gag yienj neix,
cingqcaen dwgyaez, yawj bak baez
mbouj mbwq! (2 sat)

Daengngoengz Baihdoeng Mbouj Rox Doek

——Cimh Riz Bak Bi Cungguek Gungcanjdangj

□ Cingh Swmungz / 清似蒙

Lingzvuengz nauh hwnj mbwn,
Deng baihgwnz cazbanh,
Gaemh hwnjdaeuj guenjhanh,
Naeuz famh diuz daengz diuz.

Bouxrwix Gozminzdangj,
Bak luenh gangj luenh naeuz,
Baij bingdoih dwk raeuz,
Gyaij naeuz bingz doenghluen.

Dangj raeuz mbanj boudaeuz,
Vunz naeuz cix cimh bak,
Ndaq vunzmbanj fatbag,
Caksaeh hoj souciengz.

Donzfangzgiz(团防局) yaengx cax,
Gaj bae geijlai vunz,

Gwnz mbwn fwt fan rumz,
Geijlai vunz lae lwed.

Hozndat dungx youh haemz,
Vihmaz baenz yienghneix,
Cam mehmbwn mbouj leix,
Cam diegdeih mbouj han.

Mokfaenx naek cix naek,
Mbouj ndaej saek gyauejroen,
Bya sang gaz baihdoeng,
Daengngoengz ciuqiengh hwnj.

Mauz vejyenz daeuj daengz,
Vunzlai faengzyetyet,
Lumj gvaq cieng gvaq ciet,
Dieg Sienghgyangh angqyangz.

Mauz Cwzdungh youq neix,
Byaij cien leix roenbya,
Bae Cangzsah dauqma,
Ndae ra ok caenleix.

Mauz Cwzdungh gvanbaz,
Raiz gaujcaz baugau,
Vunzlai angqvauvau,
Yawj dijbauj gvaq gim.

Faenzcieng mbouj coenz gyaj,
Haenh baihlaj baenz ndei,
Aen nungzvei rengzfeiz,
Vunzlai caez haeujcoengh.

Faenzcieng cungj vah deng,
Coi roengzrengz bae guh,

Gaej lau lai "cauhhux",
Laebdaeb guh roengzbae.

**Sam,Yaek Baenz
Cix Mbouj Baenz**

1. Baengzyoux Baenz Vunzdig
Guhdoih hoenx baihbaek,
Da raen yaek ndaej hingz,
Byonghloh cix sou bing,
Dingz din cij hemq genx.

Yaek baenz cix mbouj baenz,
Dangq dwk nyaen deng duet,
Gaenriengz baihlaeng buet,
Ndang gyuek gyaenqsaengsaeng.

(8)